

Kerweredd 2015

Woann die Sunn steht goanz owwe am Firmamend,
de goanze Ord wie verriggd dorsch die Gasse rennd,
doann is in Ramscht wirrer Kerwezeid,
isch hoff, ihr seid fit, un fer die Kerweredd bereid,
denn isch hem mer es goanze Joahr iwwer nodierd,
was unser Agende im Ord hewwe so fixierd.
Ob sich oaner hod von soine Fraa getrennd,
orror besoffe mim Audo dorsch die Stroaße rennd,
des alles wurd vun mir recherschierd,
un doann in de Kerbspruch noinodierd.

Drum horschd jetzd gut zu, isch du aa ned lalle,
die Kerb, wer boinoh ausgefalle.

Weil do driwwe uffem Rathaus, hodd oaner gehandelt un ned gedacht,
un hed boinoh aus de Kerb e Griechenlandhilfspaked gemachd.
En neie Vertraach fer de Innehof wurd uffgesetzd,
mid dem Babierstigg doann in de GVO gehetzd,
dord herschde doann au ned groad en geistiges Beben,
un die Volksvertreter dunn aach noch schee es Händsche heben.
Als de Kerweverein wolld im Februar doann de Innehof reservieren,
dud mer denne doann es Schrifdstigg präsentieren.
De Kerweverein woar nadierlich total schoggierd,
weil iwwer de Innehof werd größteils die Kerb finanziert.
Un so woar mer korz devor, un ich redd koan Stuss,
dass die Kerb ohne Innehof ausfalle muss.
Um eine Minute vor zwölf, hodd mer sisich gerad noch geeinigt,
un des Problem is jetzd hoffentlich bereinigt.
Liebe Astrid un lieber GVO, eisch ruff isch jetzd zu,
woas ehr do getriwwe hebbt woar en große Schmu,
weil wann mer Veranstaltung boinoh so de Grotze abdreht,
kennd ihr mid zugugge wie es Ehrenamt de Bach nunnergehd,
ewwer des is ned die oanzisch ärgerlich Geschichde,
iwwer es Vereinslager am Bahnhof muss isch aach noch berischde.
Alle Vereine muusde do owwe raus,
weil en Investor machd aus em olde wirrer a nei Asyldehaus.
Ersd wurd de Veroine es Veroinshaus am Bauhof weggenomme,
doann sin se in de oald Asylbewerberunterkunft am Bahnhof unnergekumme,
doch die Möglicheid is jetzd aach Geschichde,
e poar Veroin konnde noach Traase ins olde Rathaus ziehe, du isch eisch
berischde.

Ewwer des soll joa aach verkaafd wern, weil koa Geld is in de Kass,

un die Veroine hogge wirrer uff de Gass.
Doch ersd Ende 2016, mer dengd mer is joa ned dumm,
weil do is nämlisch die Kommunalwahl rum.
Doch des, hewwe mir schon lang kapiert,
un unser Meinung zu denne Sache wern mid Sicherheit uff die Wahlzeddel
nodierd.
Denn die Veroine un ihr Arweid derf mer ned verprelle,
alle Politiger misse jetzd moal die Ohre schelle,
weil ehrenamtliche Tätigkeit is in unserer Gesellschaft e wischdische
Sache,
un iwver Telefonzelle mid Bischer un so en Quatsch kenne die Veroine nur
lache.
Ewver jetzd heb isch aach genuch politisiert,
denn jetzd berisch isch eisch was die Helde aus unserem Ord hewwe so
fixierd.

Wann mer so is zwische sechszej un achzej Joahr,
muss mer was lerne, des is kloar.
Egal ob Bäcker, Schroiner, Elektriker oder so,
iwver en ordentliche Lehrberuf is jeder froh,
Un de allerschenste Lehrberuf, do kennd er mol horsche,
is Kerwefuchs in Ramscht bei unsere Kerweborsche.

Do lernd mer feiern, doanze, tringe,
bei Umzuch schee vum Kerwewoache winge,
des alles un noch veel mer Sache,
lernd mer fers Lewwe, brauchd ehr ned zu lache.

Un seid letztd Joahr is bei uns oaner debei,
der leefd immer rum, gepellt wie aussem Ei.
Die Frisur sitzd immer fabelhaft,
un des rund um die Uhr dank 3 Wetter Taft.
Der hod sich gud bei uns integriert,
schee bei jedem Umzug mitmarschierd,
Annoncde gesammelt un Plakade gebabbt,
des hoad im ersde Joahr schon mol prima geklappt.

Un doann woars am Kerwefreidag endlich soweit,
die Kerb woar do un unsern Fuchs woar bereit,
schee oagezoe un subber frisierd,
isser um sechs uff de Kerweplatz marschierd.

Do hod er doann gedrunge, gegesse un a geschwäzd,
nur es veele Bier dringe hod er e bissje unnerschäzd,
un so isser doann geje Mitternoacht mid de Aache verleiert,
dorsch die Bachgass wirrer hoam geeiert.

Die Hausdier uff, die Trepp nuff, des ging grad ned schnell,
in soi Zimmersche noi un schun gings los, die Fahrt uffem Karusell.
Un doann hod er gekotzd soi Bud so rischdisch voll,
des foand unsern Fuchs iwwerhabd ned doll.
„So en Mist ewwer aach, was soll isch bloß mache,
dodriwwer dud moi Mudder mid Sicherheit ned lache.
Die dud mid mer kreische das mers hert im goanze Haus,
un die restlich Kerb fällt mid Sicherheit aus.“

En Plan mussde her um des zu kaschiern,
unserm Fuchs, wolld sich joa uff koan Fall blamieren,
un so hod er doann alles was vollgekotzd war,
zusammengerafft, in de Schroank gestobbt, weg woars, wunderbar.

Am negste Moind, soi Mudder wolld ihn grad wegge,
dud se, als se in soi Bud kimmd zu Tode erschregge,
sie dengt, soach moal heb ich den Anbligg getroamd,
em Fuchs soi halb Bud is leergeroamt.
„Gratian, uffwache ewwer sofort!
Warum is es halbe Inventar vun doim Zimmersche ford?“
Es Beddzeich, de Debbisch, alles dud fehle,
koannst du des mir veeleicht moal erzehle?
Modder isch glaub die hewwe bei mir gebroche oi,
un zwar wie isch geschloofe heb, des is werglisch net foi.
Die Mudder dengt des is immer noch en Draam,
bis uff den sieß-saure Geruch der aus de Schroankdeer koam.
Goanz vorsichdisch machd se die Schroankdeer uff mid veel Mud,
un do siehd se a glei was do so müffele dud.
„Gratian du Dreggwatz, saach moal bisde beklobbt,
hoast alles vollgekotzd un doann in de Schrank noi gestobbt,
du nimmsd jetzd den Kroom, bevor es gibd Dresche,
un dusden schee in de Weschmaschin wesche.
Un so is unsern Fuchs mid soim Kroom zu de Weschmaschin marschierd,
un hod zur Straf die 3 Stunn beim Wesche kontrollierd.
Mein lieber Gratian isch geb der en Tipp,
drink ned bei jeder Rund a Biersche mid,
sonst dusde ned so loang wie die oannern Kerb feiern,
sondern gehsd wirrer hoam un mussd aach noch reiern.
Un falls es so kimmd, wer hätte das gedacht,
heb isch dir moal zur Sicherheit veer Kotzdudde mitgebrachd.

Wenn mer Hochzeit feierd in unserm Ord,
muss de Bräutigam vorher ersd noch moal zum Jungeselleabschied ford.
So is des aach letzd Joahr im September bassiert,
fer 22 Mann wurde en Reisebus organisiert,
un es wurd ziemlich hefdisch, doruf kennd ehr eisch verlasse,
es galt nämlich de Wendels Jan aus de Freiheit zu entlasse.
Zwaa Doach loang wollde die Kerle feiern,
mer du ja nur oamol im Lewe rischdisch heiern.
Nadierlich mit dabei, was soll isch erzehle,
so en kloane Kommissar aus unserm Ord, der darf ja ned fehle.
Samsdoachs moiens, am Kerweplatz do woar de Start,
Michelstadt im Orrewald woar es ersde Ziel der Fahrt,
in die Hausbrauerei, Bierprob un Esse des woar foi,
noach zwaa Stunn wirrer in de Bus, nächstes Ziel Ludwigshafen am Roi,
un do wurd a ned loang rumgeeiert,
sondern de Übernachtungspunkt direkt oagesteiert.
In e Jugendherbersch wurd noimarschierd,
denn do hab mer sich fer oamol iwwernoachde oiquaddierd, in
Mehrbedzimmer dun sich de Männer verdeile,
nur de Bräutigam durfde im Doppelzimmer weile,
un so dud mer sich doann, ohne zu streide,
uff de Höhepunkt des Ausflugs vorbereide.

De Dürkheimer Worschtmarkt war das auserkorne Ziel,
zu esse und dringe gib't dort bestimmt viel,
de Bus hod se doann schee noach Bad Dürkheim kutschiert,
dord oagekumme wurd doann ersd moal de Rückweg studiert,
de Buggel do nuff, wo die Stroaß machd en Knigg,
is de Stroaßenboahnhaldestelle, vun do aus foahrn mer zurigg,
ohne umzusteie fährd die Bembel immer gerad aus,
bis noach Ludwigshafen vor unser Iwwernachdungshaus,
jeder hoad geniggt, denn all hoans kapiert,
un so is mer doann um 16 Uhr ins Woizeld marschierd,
soi plätz oigenumme am reservierde Disch,
zum Kellner geruffe, 22 Bier, gezapft ewwer frisch,
der seegt: Seid ihr uff de falsch Veranstaltung hier?
Uffem Worschtmarkt gib't's Woi und koa frischgezapft Bier,
ok, doann hald Woi, was gidds doann fer Lage?
22 Woischorle in Gläser 0,5 koannsde hertraage,
un so wurd doann gefeiert, gedoantz un getrunge,
un de Kellner alle halb Stunn zum nachfülle wirrer hergewunge,
die Zeid dort verging veel zu schnell,

draus woars schun dunkel un ned me hell,
alles woar subber un a rischdisch schee,
un doann mussd de Kommisar emol pinkele geh.

Die Entfernung vum Woizeld zum Klo, ischg muss uffbasse das isch ned lach,
woar so groß wie die vum Kerwestachel zu de Apothek, gerad iwwer die
Bach,
de Hieweg woar fer unserm Kommisar iwwerhabd koa Problem,
er mussde joa nur gerad aus 10 m aussem Zeld rausgehn,
de Rickweg vum Klo dud sisch do schun schwieriger gestalde,
10 m geradeaus iwwer die Gass, konnd er sisch nämlisch ned behalde,
un so isser doann, vun de veele Mensche un em Woi völlig verwirrt,
e Stunn loang uffem Woschtmarkt als ums Zeld rumgeirrt,
wen er aach gefreegt hod, die konnd er all ned versteh,
die konnde nur pälzisch, un die Sproach is werglisch ned schee,
un noach all dem Gesuche had ihn de Mut doann verlasse,
un so isser alloa, zu de Stroaßebahn, durch die Dürkheimer Gasse,
er hoggd sisch oan e Haldestell, vum Woi völlig benumme,
die Stroaßeboahn werd ja hoffendlich glei kumme,
die kam aach werglisch ziemlich schnell,
nur oahalde dud se ned, des is ekelhaft, gell,
unserm Kommisar hatte sich nämlisch völlig frustriert,
an oaner Bus statt Stroaßeboahnhaldestelle postiert,
also wirrer uffsteie un die Stroaß weider laafe,
bis oan die rischdisch Haldestell, fer die Stroaßeboahn, noach Ludwigshafen.
Un beim zweide Versuch hoads doann besser geklabbt,
un er hoad sich en Platz in de Bembel noach Ludwigshafen geschnabbt,
Fer die Foahrt hod die Stroaßeboahn e halb Stunn loang gebrauchd,
un doann is de Kommisar vor de Jugendherbersch uffgetauchd,
un weil die Oigangsdeer nur mid em Zahlekood uffgehd,
hod den sich de Flexer uffgeschriwwe, der is ja ned bleed,
0815 hod er ins Display oigedriggt,
un schun is die Hausdeer uffgekliggt,
des woar noch oafach, doch die Probleme wurden schlimmer,
er hod nämlisch koan Schlüssel gehad fer soi Mehrbedzimmer.

Die oannern 21 dunn uffem Woschtmarkt noch kräfdisch feiern,
en Grund woar ja do, de Jan dud bald heiern,
un midde in de Feier, es werd getrunge und gebabbelt,
als beim Rosse Alex es Telefon rappelt,

„Ich bins de Flexer, bitte komm schnell nach Haus,
isch kumm ned ins Zimmer un flipp hier glei aus,“

„Flexer du Esel, isch koann disch ned rischdisch versteh,

es ist ersd elf Uhr, wir wolle noch ned geh,
wo bist dann du, du wollst doch nur pisse,
wir vermisse dich seid Stunden, und zack, woar die Verbindung abgerisse,“

Gegen 1 Uhr sinn doann die negste Richtung Unterkunft verschwunne,
un ihr kennd eisch mid Sicherheit denge, wen se uffem Gang, vorm Zimmer
hewwe schloofend vorgefunne,
De Kommisar Flexer, un wie es is fer en Beamte korrekt,
hod kerzegroad vor de Zimmerdeer uffem Gang oigeheggd.

Mein lieber Flexer, dass du dusst beim nächste Ausflug doi Kumpels ned
verliern,
dussde dich am beste mim Navi vum Klo, 10 Meter iwwer die Gass ins
Woizeld zurigg navigieren.

So isch muss misch moal a bissje regeneriern,
un die negst Geschischd dud eisch de JP präsentieren,
weil der hoad ab negsd Joahr de Zylinder uff,
un machd mid de Rämschder an Kerb rischdisch oan druff.

Gude Ihr Leid, isch bin`s de JP,
ab neggst Joahr für isch do owwe Regie.
Drum Ihr Leid horschd emol zu,
was isch euch berischde du:

In Darmstadt steht de lange Lui,
un der is ganz schee hoch.
Wenn man dort owwe runner guckt, sieht me de große Woog.
Doch größer als de große Woog, un das is in der Tat,
der 98er Sportverein auf Bundesligafahrt.
(evnt. Pause weil Lied)

Isch koames eisch erzähle, isch du eisch berischde,
die Lilien schreiben Bundesligageschichte.
Dosch marschiert von Liga 3,
un e paar Bellrämschter Jungs woaren immer mid debai.
Ewwer des sin koa Eventis, wie mer se neideischt nennt,
die sin schun in de Regionalliga zu de 98er gerennt.
Un oaner von denne Kandidade,
is außerdem noch in Mühlthal bei de Sozialdemograde.
Der schwätzd oft viel, un allemol a Stuss,
is Vorsitzender vom Sport und Kulturausschuß.
Der wohnt in de Pfaffegass, ihr dud en all kenne,

gell Matti, isch derf disch doch namentlich nenne.
Der dud sich aach noch fer Leischdatlethig engagchieren
Un deshalb dud er Samstags vorm letzde Spiel
Noch es Hammerwurfmeeting in Fränkisch-Grumbach moderieren.
Un bis in de oarrewoald dud me de Matti schätze,
wie der dud hoald gern veel un loang schwätze.
Doch Sunndags stehn nur die 98er uffem Plan,
un so dud er um verdel vor 12 mim Bus rischdung Böllefalldor foahrn.
Um sich vorzubereide uff des wischdsche Spiel,
trinke dud der sowieso ned viel.
Während em Spiel isser goanz newer de Kapp,
dud schwitze un zittern, lacht sich iwver Schiedsrishderentscheidunge
schlapp.
Doch als es Spiel gewonne is, is die Freude rischdisch groß.
Denn jetzd geht die Party erst rischdisch los.
Es werd gesunge un geschungelt,
un des ein oder andere Bier gedrunke, so werd gemungelt.
Fodos gemocht un Ehrenrunde gedreht un gehofft,
das der Doach noch ned so schnell vergehd.

En Bus dud doan die Mannschaft holle,
weil die in de Stadt, im Ratskeller, noch wieder feiern wolle.
Doch die Rämschder Borsche bleiwe noch vor Ord,
es gab ja noch Bier un des muss jaa aach ford.
Gege 22Uhr, alles woar noch gligglich un froh,
steht uff oamoal de Mannschaftsbus wirrer do.
Guggt eisch den Bus emol oa, is der ned foin?
Wisst er, seegd de Matti do hogg isch misch jetzd e mol noi.
Die oannern soache, mir bleiwe mol hier,
un dringe liwver noch a Pungschder Bier.
Doch de Matti der is unscheniert,
Rischdung 98er Bus wieder maschiert.
Doch vor de Busdier dud en Wachmann steh,
un seegt zum Matti:
„Nur wann se im Presidium sinn, derfe se in de Bus noigeh.
Ewver isch seh do groad was, des is mer bekoannd,
jeder aussem Präsidium, hod oam Oarm wie sie, so e Boand.“
Doach oans dud de Wachmoan beim Matti ned sehe,
uffem Oarmband dud Hammerwurfmeeting Fränkisch-Grumbach druff stehe.
Un so macht de Matti mit einem Satz,
in de Bus noi un nimmd uff em Zweiertsitz platz.
E poar Minute später werd de Bus immer voller,
de Matti dengt:“ Die Sach werd immer doller.“
De Präsident, de Geschäftsführer oall goanz foi,
steige in de Bus enoi.

Die Diern gehen zu un zapp zarrap,
fährt de Bus vom Stadion ab.
De Matti hoggt hinnedrin goanz ungeniert,
mol guggе woas heid owend noch bassiert.
Die oannern Borsche aus unserm Ord,
die suche de Merker, denn der is plötzlich ford.
„Im Lewe ned is der schon hoam,
der wold doch noch mid uns in die Innenstadt foahrn.
Auf, wir foahrn jetzd mid de Bembel uffs Schlossgrabenfest noi,
irgendwo wer de Merker schon soi.“
Doch de Merker hoggt noch im Bus un wird ungeschied,
zum feiern mim Präsidium an de Ratskeller chauffierd.

Dord steigt er aussem Bus aus, zeigt soi Oarmbändsche korz vor,
un schon öffned sich wieder Tür un Tor.
In de Ratskeller noi, de Matti koanns ned fasse,
die Mannschaft dud do drin schon die Puppen tanzen lasse.
Er macht erst moal ans Buffet un dud moal was esse,
soi Kumbels die hoad er schon längst vergesse.
Un so feierd er die ganze Noachd, ewwer des is koa Kunst,
weil fer die 98er woar im Ratskeller joa alles umsunnst.
Un isch hoff du hoast Ramscht ned bei de Lilien blamiert,
un hoast mim Trainer un de Mannschaft die halb Noacht iwwer Polidig
diskuddierd?

Do hew isch dir woas midgebracht, do guggste mol noi,
Vielleischd is joa woas für die negst pardy für disch deboei.

So Stickle, hoasde wirrer a bische Lufd geschnabbt,
das des mim End vun de Redd jetzd noch klabbt?

Ja ja, des klabbt schun, ihr werd schon sehen,
danach kann isch beruischd in Ruhestand gehen.

So, ihr Leit des klingt zwar dumm,
ewwer die Kerweredd die is jetzd rum,
isch hoff die Redd hodd eisch gefalle,
doann losd e bissje Applaus iwwer die Blaasch weghalle.

Bleibt joa noch do, dud noch woas tringe un esse,
es schwätze mid de Leit derfd ehr ned vergesse,
ewwer woas soag isch, des wissd er, des is ja kloar,
Kerb is hoald nur oamol im Joahr.

Heid Owwend speeld X-IT noch, do owwe uff de Bihn,
un moje frieh is aach en goanz wischdische Termin.
De Friehschobbe vun unserer scheene Kerb,
do missd ehr all kumme, isch hoff ihr seid ned merb,
un Mussiger konnde mer a engaschiern,
die Modautaler Spitzbuwe wern mid de Quetsch dorsch die Reihe
marschiern.

Un moje Owwend, do sin mer all froh,
als Live Act uff de Biehn speeld C.I.O.,
un nadierlich, do werd ehr horsche,
es Showprogramm vun de Kerweborsche.

Un doann is die Kerb wirrer moal rum,
isch hoff ihr grund ned un bringd eiscch ned um,
denn negsd Joahr, do sin mer wirrer bereid,
woans hasd in Ramscht is Kerwezeid.

Bleibd mer all gesund un dud aa was fixiern,
weil der JP muss sisch ja was fer die Kerweredd nodiern.

Zum Ende du isch eisch nochmoal winge,
doann mach isch misch runner, un du oaner tringe,
bleibd munder, glicklich und a froh,
denn dier Rämshder Kerb is do.

WEM IS DIE KERB???